



Nguvu Ibadilishayo ya Utii

kwa Sheria ya Mungu

Pamoja na hayo nitajisazia katika Israeli watu elfu saba, kila goti lisilomwinamia Baali, na kila kinywa kisichombusu. —1 Wafalme 19:18.

Leo, kama katika siku za Eliya, mstari unaotenga kati ya watu wa Mungu wanaoshika amri na wale wanaoabudu miungu ya uongo imechorwa waziwazi. “Mtasita-sita katikati ya mawazo mawili hata lini? Bwana akiwa ndiye Mungu, mfuateni; bali ikiwa Baali ni Mungu, haya! Mfuateni yeye” (1 Wafalme 18:21). Na ujumbe wa leo ni: “Umeanguka, umeanguka Babeli ule mkuu... Tokeni kwake, enyi watu wangu, msishiriki dhambi zake, wala msipokee mapigo yake. Kwa maana dhambi zake zimefika hata mbinguni, na Mungu amekumbuka maovu yake” (Ufunuo 18:2–5).

Muda si mrefu jaribio litakuja kwa kila nafsi. Utunzaji wa sabato ya uongo utasisitizwa juu yetu. Pambano litakuwa kati ya amri za Mungu na amri za wanadamu. Wale ambao wamejisalimisha hatua kwa hatua kwa madai ya tamaa za ulimwengu na kufuata desturi za ulimwengu wakati huo watajisalimisha chini ya wenye mamlaka, kuliko kujitoa wenyewe kwa ajili ya dhihaka, matukano, kutishiwa kifungo, na kifo. Wakati huo dhahabu itatenganishwa na takataka. Utauwa wa kweli utatofautishwa waziwazi kutoka kwa mwonekano na mapambo juu yake ya bandia. Nyota nyingi ambazo tumependezwa nazo kwa sababu ya uangavu wake wakati huo zitatoweka gizani. Wale ambao wamejichukulia mapambo ya patakatifu, lakini hawajavaa haki ya Kristo, wakati huo wataonekana katika aibu ya uchi wao wenyewe.

Miongoni mwa wakazi wa dunia, waliotawanyika katika kila nchi, wapo wale ambao hawajampigia goti Baali. Kama nyota za mbinguni, ambazo huonekana wakati wa usiku tu, waaminifu hawa wataangaza wakati giza litakapoifunika dunia na giza kuu litazifunika kabila za watu. Katika Afrika ya kipagani, katika nchi za Kikatoliki za Ulaya na Amerika Kusini, nchini China, India, katika visiwa vya bahari, na katika pembe zote za giza za dunia, Mungu ameweka akiba anga la wateule ambao bado wataendelea kung’aa katikati ya giza, wakidhihirisha wazi kwa ulimwengu ulioasi nguvu ifanyayo matengenezo ya utii kwa sheria yake. Hata sasa wanaonekana katika kila taifa, kati ya kila lugha na jamaa; na katika saa ya uasi wa kina kabisa, wakati juhudi kuu kabisa ya Shetani inafanywa ili kuwasababisha “wote, wadogo kwa wakubwa, na matajiri kwa maskini, na walio huru kwa watumwa,” kupokea, chini ya adhabu ya kifo, ishara ya utii kwa siku bandia ya kupumzika, waaminifu hawa, “wasio na lawama, wala udanganyifu, wasio na ila,” “watang’aa kama mianga katika ulimwengu” (Ufunuo 13:16; Wafilipi 2:15). Kadiri usiku unavyozidi kuwa wa giza, ndivyo zitakavyong’aa kwa uzuri Zaidi (Manabii na Wafalme, sehemu ya 1. uk. 159 – 161).